

Conmemorando nan di 6 lustro, FALPA a inaugura un studio mas moderno



DIA 19 di juni ultimo FALPA, Fundacion Arubano pa Lectura Papia y Adapta, a celebra su di 30 añ di existencia. Manera ta conoci, FALPA ta percura pa produci, presta y distribui lectura papia.

E fundacion tin su propio studio di grabacion den Biblioteca Nacional na Playa.

E lectura papia aki ta p'e personanan cu no por lesa pa motibo cu nan tin un limitacion (temporal of permanente). P.e. e personanan cu un limitacion visual of fisico, e enfermanan den hospital, e personanan cu dyslexia. E lectura ta cu meta educativo of recreativo. Asina Edgar Croes, kende ta Presidente di FALPA a duna di conoce siman pasa, na conmemoracion di nan 6 lustro.

E ultimo añanan FALPA tabata hopi activo siguiendo e ultimo desaroyonan riba tereno di lectura papia y con pa haci uzo di e desaroyonan aki mas mihor posibel. Despues di a haya cooperacion di sponser p'e proyecto aki, FALPA a modernisa e proceso di produci y reproducir lectura papia completamente cu ayudo di trainernan profesional y e aparatonan digital

moderno adkeri.

Durante e celebracion aki Gobernador a inaugura e logo nobo di FALPA. Presidente di FALPA, Edgar Croes a gradici e diseñador, Chibi van der Hans, calurosamente pa su donacion na FALPA den forma di e diseño aki.

E logo nobo di FALPA ta referi n'e lectura papia cu FALPA ta produci y e ta representa un combinacion di un buki habri y e oido. Directiva di FALPA ta masha contento cu e logo nobo y tin intencion pa den futuro cercano propaganda mas e servicionan cu FALPA ta brinda na comunidad.

Tambe e prome buki digital den forma papia produci aki na Aruba a wordo entrega na Gobernador, Directora di Biblioteca Nacional, Presidente di FAVI, yiu di escritor di e buki, un alumno cu dyslexia y un trahador di Pro Bista, e fundacion pa hende cu problema di bista na Corsow, kende a bin specialmente p'e celebracion aki.

Un buki digital papia bo por scucha via un Daisyspeler, un MP3-speler, un computer cu software special y hasta via un IPOD. Despues a sigui palabran-

an di gradicimento na tur esnan cu a contribui na realisacion di ciencia y aparatonan nobo na Aruba.

A wordo menciona CEDE-Aruba, Aruba Way, Rotterdamse Vereniging Blindenbelangen, Dedicon, FAVI y Nagico.

Pa clausura Gobernador a haci reapertura di e studio renoba y a haya un explicacion tecnico di un di e boluntarianan tecnico di FALPA. Despues di e parti oficial e invitadonan a disfruta di un brindis y algun snacks.

Tur persona cu un limitacion temporal of permanente den lesamento por presta cerca FAVI lectura papia y (si nan tin mester y cu tin e momento ey disponibel) aparatonan pa por scucha lectura papia. E servicio di prestamo aki to gratis.

FALPA tin actualmente un cantidad limita di buki den forma di lectura papia na Papiamentu, Hulandes, Ingles y Spaño.

E bukinan den forma di lectura papia den otro idioma FALPA ta presta for di exterior. Cu ayudo di boluntarianan FALPA ta spera di por aumenta den corto tempo e coleccion di lectura papia den idioma Papiamentu.

FALPA ta traha solamente cu



cooperacion di boluntarianan y tin mester di mas boluntario pa hacie trabao di produci lectura papia, aumenta e coleccion di lectura papia y mantene e coleccion di lectura papia.

FALPA ta spera di por duna servicio na hopi hende cu limitacion den lesamento den e añanan benidero. Pasobra: "Les ta dushi pa tur hende", asina Edgar Croes, Presidente di FALPA a conclui.

